

SARAWAK DEKA NGANGKATKA JAKU ENGLISH BAKA BM

16 November 2015

- The Borneo Post Online

Dikarang Jacqueline R. David

KOTA SAMARAHAN: Sarawak ngemeratka guna ngangkatka jaku English sebaka enggau jaku Melayu (BM), ku Kepala Menteri Datuk Patinggi Tan Sri Adenan Satem.

“Jaku English ukai semina jaku orang ke kala merintah menua kitai kelia tang Jaku English endang dikena di serata dunya, jaku ba subjek Sains, Filosofi, Teknologi, Pengawa Dagang sereta pemerat bukai.

“Kitai di Sarawak ngemeratka jaku English sebaka enggau BM lalu sama deka diangkatka,” ku Adenan.

Iya madah munyi nya maya Pengerami Konvokesyen Universiti Malaysia Sarawak (UNIMAS) ke-19 di DeTAR Putra ditu, kemari ti bela digulu urung 4,000 graduan sereta pemesai UNIMAS ke bukai.

Iya madah, kemaya hari tu kitai suah beratika Jaku English nya nyadi pemerat dalam pelajar, laban ti kelalu ngemeratka BM ngujungka jaku English kurang dikeibuh.

“Kitai patut ngangkatka kededua jaku nya nyadi ngambika kitai landik dalam nguna kededua jaku nya,” ku iya.

Iya nandu baru, mayuh ari graduan diatu enda teulihka pengawa laban kurang landik bejaku English.

“Ari sukut bejaku English, beribu graduan enda teulihka pengawa, laban mayuh ari graduan tu enda landik bejaku English kelebihan agi lebuah minta pengawa ba kompeni menua luar ke begunaka pengereja pengawa landik bejaku English.

“Tu mih maya iya, kitai bepunka ngemeratka jaku English,” ku iya.

Ngenang sentang pengerami nya, Adenan ngelalau bala graduan ngambika terus ingatka pengerami nya.

“Sehari tu, kita bulih perais (laban udah nembuka pelajar), apai indai pan gaga ati laban bala anak udah mujur. Tang anang semina naka degree aja, pajakka ngiga penemu bukai, masters tauka rogram bukai.

“Terima kasih mega ngagai UNIMAS laban udah meri gelar ngagai aku, Pro Chanselor ke meri aku gelar ‘Dr’,” ku iya.

Seiti ari pemutus ke digaga Perintah Negeri 20 taun ke udah, ku Adenan, iya nya seiti pemutus ke chukup manah, lebu muka sebuah universiti di Sarawak, iya nya UNIMAS.

“Naka tu, UNIMAS udah mayuh mantu komuniti di Sarawak, Malaysia lalu iya diatu nyadi universiti kelapan ari 20 buah universiti di serata menua Malaysia, universiti ke pepadu nyulut. Tu seiti pemujur ke manah,” ku iya.

Lebu ngelalau bala graduan, iya madah gaya dunya diatu enda sebaka dibanding enggau maya bala graduan agi belajar di universiti.

“Belabuh ari pagila, kita deka meda dunya tu enda sebaka baka ke dikerundingka kita maya agi belajar di universiti.

“Dunya diatu majak mayuh pamar, nya utai ke bendar, tang UNIMAS udah nyendiaka palan ke kita betapi enggau semua pamar nya. Kita tetap deka teulihka pemujur laban kita bisi penemu.

“Meri terima kasih ngagai apai indai kita, kaban belayan, laban enti enda ketegal sida, kita nadai ditu.

“Nya alai patut meri terima kasih ngagai sida iya laban udah meransang kita nyentuk teulihka pemujur,” ku iya lalu ngasuh bala graduan ngena pengelandik sida iya ke meri penguntung ngagai diri sebilik sereta komuniti.

Kelimpah ari nya, Adenan madahka UNIMAS diatu patut bisi sepital endur ngajar bala nemiak ngambi sabjek nyadi lutur.

“UNIMAS patut bisi sepital universiti tang kitai begunaka belanja besai dikena ngaga sebuah sepital universiti untkup UNIMAS,” ku iya.

Perintah Negeri enggau UNIMAS ku iya, deka minta pan nya ngagai Perintah Besai dikena ngaga sepital dalam universiti ke ulih alai urung 1000 iku nemiak belajar nyadi lutur.

Nangkan nya ba aum media, Mandal Canselor UNIMAS Prof Dato’ Dr Mohamad Kadim Suaidi madah, rambau Konvokesyen ke-19 UNIMAS nya urung 3, 919 graduan udah nembuka pelajar sida iya, (3,570 graduan bachelor degree enggau 357 graduan siswazah ke nyengkaum 46 pemegai PhD enggau 301 (Masters degree).

“Kami berasai temegah meda pemujur UNIMAS laban mayuh agi nemiak milih masuk UNIMAS belajar ditu.

“Kami ngarapka iya terus dipilih nemiak setipak enggau tuju universiti nyadi universiti ti dikerindu ,” ku Mohamad Kadim.

Ba pengawa ngerembaika sayap universiti nya besai agi ngagai semenanjung, iya madah UNIMAS bisi nyendiaka penambah enrolmen lebuah Palan Endur Belajar Bersepadu Sibuh, Sarawak enggau Palan Endur Belajar Bersepadu ke 'Pembelajaran Sepanjang Hayat' enggau Program Pascasiswazah di Lembah Kelang deka dibuka taun tu.

Program CMBA tauka 'Corporate Masters in Business Administration' nerima timbal ke manah, ku iya.

Sama bisi datai, Chairman Kaunsil Direktor UNIMAS Datu Dr Hatta Solhi, Sapit Mandal Chanselor (Pekara bekait enggau Pelajar enggau Alumni) Professor Mohd Fadzil Abdul Rahman sereta pemesai UNIMAS ke bukai.